

EMANTZIPAZIOA OKUPAZIOAZ HARAGO



Lander Arretxea Bereziartua
@larretxea



Iruñeko Txantreako emantzipazio bulegoan, banku eta erakundeen eraikinak okupatzeko aholkularitza eskaintzeaz gain, etxebizitza hutsa duen auzotarrarekin adostasuna bilatzen dute zerbitzu-truke bidez.



TXANTREAKO EMANTZIPAZIO BULEGOA

- **Helburua:** Etxebizitza eskubidea.
- **Kokapena:** Txantreako Auzotegi Kultur Etxean (Iruñea).
- **Ordutegia:** Astelehenetan 18:30etik 19:30era.
- **Lan-ildoak:** Okupazioa eta alokairu prekarioak.

35.466 etxebizitza huts Nafarroan, haietako 13.199 Iruñerrian. 2013koak dira datuak, baina ez dirudi hori asko aldatu dela pentsatzeko motiborik badagoenik. Eta bitartean, milaka lagun etxebizitza bat izateko aukerarik gabe: gurasoen etxea utzi ezin duten gazteak batzuk, eta are egoera gordinagoan dauden beste batzuk; ordaindu ezin dutelako euren etxeetatik kaleratu dituztenak. Ez dira kontu berriak. Nafarroan ez ezik, Euskal Herri osoan errepikatzen den paradoxa da: etxerik gabeko jendea, eta jenderik gabeko etxeak. Iruñeko Txantrea auzoan ordea, inoren zain egon gabe arazoari heltzeko tresna berria garatu dute, kolektiboa, eta etxebizitza lortzeko bide bat baino gehiago biltzen dituena: Txantreako Emantzipazio Bulegoa.

Auzoko gazteen artean egindako topaketa batean identifikatu zuten horren beharra, gazteen %73k independizatu nahi bai, baina horretarako aukerarik ez zuela adierazi baitzuen. Bertan erabaki zuten etxebizitza eskubidea bermatzeko euren kabuz antolatzea beste irtenbiderik ez zutelana. "Administrazioak, eta are gutxiago enpresa pribatuek, ez gaituzte lagunduko eskubide hori garatzen, gure eskubideak murrizten diren heinean hazten baitira haien irabaziak. Gure ustez, etxebizitza eskubidea sendotzeko modurik egokiena arazoari erantzun kolektibo bat ematea da". Geroztik, etxebizitza faltari irtenbidea aurkitu nahi diotzen Txantreako Auzotegi Kultur Etxera jo dezake astelehen arratsaldean, emantzipazio bulegoaren aholku eta laguntza jasotzeko.

Okupazioa eta alokairu prekariora

Proposatzen duten irtenbideetako bat, okupazioa da, eta horretarako aholkularitza tekniko eta juridikoa eskaintzen dute. Etxebizitzarena eskubidea den neurrian, batez ere bankuenak eta instituzioenak diren etxe hutsak okupatzea zilegi dela aldarrikatzen dute. Gero eta gehiago dira bide hori hautatu dutenak, eta auzotarren babesa ere badute, kaleak betetzen dituzten bandera arrosek erakusten duten moduan. Okupen asanblada bat ere badago jada egoera horretan daudenek bide hori hartu nahi dutenei lagun diezaieten.

Beste alternatiba bat ere lantzen dute, adostasunetik abiatzen dena. Bigarren etxebizitza huts bat duten auzotarrarekin negoziatzen dute, zerbitzuren baten truke, etxebizitza hori behar duenari utz diezaieten: etxea berritzea, seme-alabei klase partikularrak ematea...

Helduena ere baden arazoa

Txantreako Emantzipazio Bulegoa gazte mugimenduaren tresna da, baina oso ongi dakite etxebizitza duinaren falta ez dela soilik gazteen arazoa. Horrenbestez, gazte zein helduentzako bitartekoak eskaintzeko ahalegina egiten dute, eta horrez gain, harreman estua dute arazo beraren kontra borrokatzen ari den auzoko beste eragile batekin: Txantrea Zona Libre de Desahucios kolektiboarekin. "Finantza erakundeei eta etxegabeteak baimentzen dituzten instituzioei presio egin eta babes soziala areagotzeko aritzen gara elkarlanean". ■